

L'era da duas fermas magistratas grischunas va a fin

L'assemblea federala pren cumià da cusseglia federala Eveline Widmer-Schlumpf e da la chanceliera federala Corina Casanova

DA MARTIN CABALZAR

■ **Cun lung applaus ed ovaziuns en pe ha l'assemblea federala prendi cumià ier uffizialmain da cusseglia federala Eveline Widmer-Schlumpf e da chanceliera federala Corina Casanova. Cun plets simpatics ha la presidenta da l'assemblea federala Christa Markwalder prendi cumià da las duas magistratas grischunas che èn stadas omaduas otg onns en uffizi. Las magistratas partentas han engrazià – expressivamain er en rumantsch – per la confidenza demussada durant lur temp d'uffizi.** La presidenta *Christa Markwalder* (pld BE) ha renconuschì «la gronda perseveranza e l'excellenta enconuschientscha dals dossiers, dentant era ses humor fin e sitg.»

Markwalder ha regurdà als dis turbulents dal december 2007 cur che l'actuala ministra da finanzas è vegnida tschernida en il cussegl naziunal. Al cumenzament anc sco ministra da giustia haja Widmer-Schlumpf stuì sa lavurar en spert en dossiers complexs e prender decisions difficilas e quai tut «savens cunter in vent murdent».

Sco ministra da finanzas haja Widmer-Schlumpf giugà a partir da 2011 ina rolla da claf per superar la crisa da finanzas ed economia. En quest mument haja la magistrata grischuna demonstrà sias profundas enconuschientschas dals dossiers, sia insistenza e sia perseveranza e ses sentiment per quai che fa senn ed è realistic. Ordvert remartgabel saja era ch'il tegnairchasa federal saja stà equilibrà durant tut quels onns.

Cumià cun lung applaus

«Co ella ha dumagnà tut quai na savain nus betg», ha ditg Markwalder. Enconuschientschas detagliadas dals dossiers ed il plaschair da la debatta n'èn anc nagin garant per ina buna cusseglia federala. «Igl è stà dapli: ses instinct politic, sia abilitad d'acceptar critica, sia voluntad da tadlar, sia passiu da chattar soluziuns era sur ils cunfins da las partidas or.» Widmer-Schlumpf saja s'engaschada per respect en la politica e per ina cultura da l'equiliber. Il plenum – inclusiv la fracziun da la Partida populara svizra – ha engrazià a la magistrata partenta cun ina «standig ovations» e cun in lung applaus.

Parter la pussanza

Eveline Widmer-Schlumpf che è savens vegnida crititgada durant ses temp d'uffizi da sia anteriura partida, la Partida populara svizra, ha engrazià per la confidenza. En ses pled da cumià ha ella discuri davart il senn da la separaziun da la pussanza. La costituziun federala reglia las competenzas dal pievel, dal parlament, da la regenza e da la giustia.

Per tuts dettia quai cunfins, ha punctuà Eveline Widmer-Schlumpf. Quests cunfins sajan da chapir sco protecciun cunter l'arbitrariadad ed impedeschian ch'il jeu cun las temas da la populaziun haja consequenzas graviantas per la Svizra. «Il resguard dals cunfins, il respect da las competenzas e la responsabladad da mintgamai l'autra ha fatg ferma noss pajais, ha ditg Widmer-Schlumpf.

La via da la Svizra consistia en tadlar in sin l'auter, respectar auters mainis ed autras minoritads e l'abilitad da far

cumpromiss. Tut quai na dastgia betg vegnir unfri per interess politics particulars da curta vista.

«Sistem politic n'è betg in Intercity»

Prendi cumià ha l'assemblea federala era da la chanceliera federala *Corina Casanova* che è medemamain sa retratga suenter otg onns. «Sia marca caracteristica è da diriger decentamain davos las culissas», ha renconuschì Markwalder ils merits da la chanceliera partenta da la Partida cristiandemocratica. Ella haja preparà fitg bain las sesidas dal cussegl federal, quai che haja contribuì essenzialmain al bain funcziunar da quest gremi.

Sut la direzziun da Corina Casanova ha la chanzlia federala realisà impurtantas refurmas. «E grazia a Casanova è il

cussegl federal uss era preschent en las medias socialas.» Markwalder ha era rendì attent che Casanova saja stada l'emprima chanceliera federala da lingua rumantscha.

La chanceliera federala partenta ha prendi cumià dal parchet da la politica naziunala en in pled en tut ils quatter linguatgs naziunals. «Jau ma sun engaschada cun fitg grond plaschair per noss pajais, per nossas instituziuns, per la plurilinguitad e per noss sistem politic.»

Il sistem politic da la Svizra na saja betg in «Intercity», ha concedì Casanova. «El è bleranz in tren regiunal cun fermadas che pussibiliteschan ad in e scadin d'entrar, ha ditg Casanova. E tutina saja quai il «meglier sistem dal mund»: el saja stabil e portia excellent resultats.



Ovaziun en pe e flurs per il cumià da cusseglia federala Eveline Widmer-Schlumpf.



L'assemblea federala pren cumià da la chanceliera federala Corina Casanova. FOTOS KEYSTONE